

Verbazingwekkend veraeltien

A-k vernemstig waere ewest a-k niet op een uutneudiging veur een bi'jienkomst van de wärkgroep dialecten van de lesselacedemie in-egaon. Ik adde bèter mutten weten, maer ja . . . ik deeë 't wel en now bin-k deklus.

Mu-j eerstens een "mooi " dialectweurtien verzunnen, döör maken zij dan een liessie van met de 10 mooisten en van die tiene kiezen zij der dan weer drie uut die wij in een veraeltien mutten gaon verwärken.

Der bint now ienmaal van die obby's die inies verrekte völle op wärkbegunnen te lieken deur de tied en andacht die-j der an mutten gèven.

Toen ik de drie weurties die ik mosse verwärken, op een rijgien ad ezet e-k der eerstens is verdwaesd naor zitten kieken en mij toen realiseerd dat graoperig ter ook tussen stond.

Graoperig . . . ja ie weten wel . . . dat stokpeertien dat ik nog wel es van stal wille alen as mij de ebzucht van de maetskappije en dan veural 't grote greien van de zo-enuumde bèter gesitueerden met oge functies, weer is een keer te völle worren. Die eren en dames die onder andere in de zörgsector, de ulpverlening, woningcoöperaties en de dienstverlenende sector de ogere functies bekleden en die maer denken dat alles allenig um un dreien en zich onnumelijk belangriek vinnen.

Ik wete dat 't zekers niet vernemstig is wat ik dat soort gasten toewense, maer geleuf mij . . . dat is gien *prettige Kärstdagen*. Ik wärke maer zes dagen in de wèke en op de zundag doe-k ook nog vrijwilligerswärk. Dat doe-k bij een zörginstellink wöör dementerende olderen wonen. Maer as de medewärkers van die zörginstellink euren dat ik in principe absoluut tegenstander bin van al dat vrijwilligerswärk, mu-j die mensen is veraldereerd zien kieken. Ie ziet ze denken . . . die vent is niet goed wies!

Klopt elemaole . . . mooi laoten zo, maer ik kan now ienmaal niet anders denken dan dat betaalde banen bewust wörrer wegbezunigd umwille van de efficiëntie van de instellingen um döörnao de open-evallen plaatsen weer in te vullen met vrijwilligers. Dat kan nooit de bedoeling van de regelingen binnen ewest, maer a-j de bewoners niet wilt laoten stikken . . . wat mu-j dan ? Maer as die rieke stinkers strakkies zelf ulpe neudig zollen ebben, denk ik niet dat dat ik döör an mèè zal doen.

Veraldereerd ? . . . Ach 't leste oordeel is toch niet an mij.

Willem W. december 2014

Vertaldereerd = verbouwereerd /overstuur /van de kook

Vernemstig = verstandig / schrande

Graoperig = inhalig